

ISSINGGA WEIHA, S'PUSCHTRAMEER, DO ISSINGGA OZEAN

ISSINGER
WEIHER

I dozehl enk heinte ollohond vom „Issinga Sea“, vom „Issinga Ozean“ odo vom „Puschtra Meer“, de drei Num sein ollgemein bekohnt im Puschtotol und im Südtirola Lond!

A Familenvoto hot im Internet beschriebm, sie warn nochn Urlaub am liebschtn dogebliedm! Jaz hearschas ollahond vo do Natur und do Gschichte, wia des olls entstonn isch, in Form von an Gedichte.

Schun 1897 hot die Familie Gasteiger die olte Mihle gekaft, 1919noar vom Baumonnhof die Wiese dozuigeaft. A Bachl isch durch de moorige Wiese gerunn und hot sich do zi an kloan Seabl zommfun.

1920-25 hot do Gottfried an Fischteich ungelegg und de Viechlan mit groaßn Fleiß gepflegg. Von Unfong un hots ausgschaug wia a Biotop, im Schilfe hobm sich ssogor Schlong umagetopt, die Gänse hob siech mit ihman Schnotton untololtn und die Zugveggl hobm ihra Roscht do gschtoltn. Währnd die Krötn ihman Konzert hobm gemocht hob die Searosn in die schianscht Forbm gelocht, doss in der Natur jedo a Freide hobm kann isch klor, bsundos wenn man dobei no bodn kann. Ett la die Nochborn hom sich do ingfun, ah die Brunegga Birga hobm gearn do aua gfun! An Ausschonk, a Umkleidekabine und a Bootshaus und drei Boote schaugn fi de Zeit foscht noch Luxus aus!

1927 isch do Gottfried vo do Gfongenschoft entlossn wordn und der Bsitz isch noar augetoalt wörschtn, do Gottfried Gasteiger ho in Sea ibonumm und hot groaßa Freide dron gfun, ettliche Jahr vor do Option hota Issing volott, er isch noch Öschtoreich ausgwondot. Die Ente tre Venezie hots keiflich erstonn, Gottfrieds Bruido Johann hot als Pächta ungfong. 1936 hotta Buichn und oan Eiche gepflonzt, Bänke hingschtellt, die Leit hobm gfeirscht und getonzt.

In do Kriegszeit hot olls Schiane ogenumm, bis do Hans Stampfl den Sea hot ibonumm, 3 Milionen Lire hotta dofir spendiert, Donoch hot olls wiedo gebliet, noar isch sei Bruido Lois ingschtiagn und hot 1958 schun a Bar betrieblm.

1960 hots die Firma Innerhofer.Waibl gekaft, do Hubert und sei Frau hobms bewirtschoftit recht brav, in die earschtn Jahr hobm sies jo selbo gfiert, ba schian Wetto hot die holbe Firma do bedient, sell hot denan Orbita recht gut gfol, ba Regnwetto ischs in do Firma weitagong, die Bänke und Millkibl hobm se selbo fabriziert,

do firmenoagne Schmied hot sie prodoziert. Die Innerhofers hob ah Bluim gepflegg und an schian Park ungelegg, off Natur und Idylle hobm se olm viel gholtn, doss sich die Bsuicha do gearn auholtn.

1973 hot Johann Gasteiger an Goschtbetrieb mit Hotel augetun, olleweil vogriaßort und hot groaßn Unklong gfun. Heint steats do in vollo Procht sei Tocht und ihr Monn fierns mit Bedocht, doss die Leit sich wohl fiehl kenn und die vodiente Erholung fenn!

Bis in die 70a Jahr isch in den Sea olls Moorwosso gewessn, wos des Bachl holt ah hott bsessn. Noar hot do Sea fir 2 Jahr gschpörrt wear gemießt, die Algn hobm des Wosso söffl vomießt. In der Zeit hot die Gemeinde an neudn Zuifluß gebaut, von Grianboch her, s' Wosso hot wiedo klor ausgschaug. Dofir hot die Gemeinde den Sea obo pochtn gewellt, hot noar ollahond Untopächta ingschtellt. In die 90a Jahr hobm die Algn wiedo den Sea vosaut, drum hot man ihn mit Schödo untobaut, de Stoane worn zwor awian hörscht, obo die Schwimma hot des ett aweil gschtörscht.

Vo 2005-7 wor do Tearna Ernscht Mair do Pächta, do Juri Stolzlechner 2 Jor Bodemeischo und Seawächta, In Winto off 2008 hot man olls umgebaut, in sea hot man in umweltbwußtn Juri unvotrat. Do Juri isch aso naturbewußt und hot den Sea mit Mikroorganismen beeinflusst. „Kreativ FloW“ und „Firma Embio“ orbatn fescht zomm und dobei isch ihman ollohond ingfol zi an Naturesea und an unerkonnt Biotop zi kemm und sich 3-400 Geschte täglich do entsponn kenn. In Winto 2008-9 hotta in Sea als Eisplotz genutzt, den viel Eislaifa gearn hobm benutzt.

Die neu umgebaute Bar mit Pizzeria schaug ah ondorscht aus wie friah, gepochtn hot sie do David Simonetti, er mocht olls selbo, sogor die Spaghetti, im Juli 2008 hotta augetun, die Geschte ssein vo sein Essn recht ungetun!

Und wer gewiss ett zi vogessn isch, do Bergila orbatit gonz biologisch, sein Kreitogorschn hobmo wo gsegn, offn Natierlichn ischn viel gelegn! Seit 1912 isch de Onloge schun in Gong, drei Generationen orbatn seither doron, seina Öle sein geprüft und vo easchto Qualität, mochn tut er sie mit gekennto Professionalität!